

## Mir sinns Volk

Omm letzde Sunndaach omm Stommdisch im Herrsch hawwe merr noch e bissi iwwern Schitzehof gebabbelt. Weil im März gehn joo die Breivoochels außem Herrsch enaus, in dem se von 1977 ab, also 33 Jahr long, dringewese sinn. Vorher warn se awwer aach schunn im Schitzehof, unn zwar ab 1971. Also heeßts dissjohr nit nor vom Schitzehof, naa, aach von unserne Werrtin unn unserm Werrt Abschied nemme, no ja, die zwaa bleiwe uns unn Flerschem joo erhalte. Im Juli kimmt dann enn neie Werrt in de Herrsch, mol sehe, ob der onn so Stommdischbrieder wie uns Interesse hott, mir sinn zwar gude Gäst, awwer monchmol aach e bissi laut.

Awwer nit omm Sunndaach, als merr wie gesaat iwwer de Abriss vom Schitzehof gebabbelt hawwe. Mittlerweile hawwe merr uns joo doodemett abgefunden, was wolle merr aach onnerst mache, awwer laad duts uns doch.

Saacht emol, frächt de Karl, was werdd dann aus dem gonze Gelände, hott merr doodefoo schunn was geheert?

Ich habb die Achsele gezuckt, awwer de Schorsch hott gesaat: Also so vill ich waaß soll dess alles bebaut werrn. Jetz werdd joo erstemol emm Charly soi Scheier zu so ner „Kulturscheune“ hergericht, mett emm große Neuegebäude unn emm Glasbau dezwische. Dess Kapellche vorne onn de Bohnhofstrooß soll erhalte bleiwe unn nodierlich bleibt aachs Rothaus stieh, awwer alles onnere soll bebaut werrn, mett Heiser ferr Wohnunge ferr Junge unn Alte, so Generationeheiser, wie merr die nenne dut.

Ich saach: Ich bin emol gesponnt, ob die nit widder alles zubaue. Ihr Männer, grad in de Mitt von Flerschem misst merr e enn Haufe Platz losse zum Hiesetze, dass merr ausruhe unn e bissi mett de onnern Leit babbele kann.

Moont de Karl: Ich habb merr aach schunn moi Gedonke gemacht. Weil wenn erst emol die Kolonnade uffem Boeder-Gelände ferdisch sinn unn die ältere Leit von de Edderschemer Strooß odder von de Riedstrooß mett ihrne Rollatorn doo enaus fahrn misse, muss merr dene die Geleechenheit gewwe, sich in de Mitt vom Weech e bissi auszeruhe. Die wolle dann koon Kaffee drinke odder so was, naa, die wolle sich nor hiesetze, bevor se später dorch die nei Unnerführung ennuner unn driwwer widder enuff dappe misse unn später widder zurick. Doo droo sollt merr denke.

De Schorsch hott genickt. Genau so sollt merr aach de Rathenauplatz e bissi freundlicher mache, ferr die Leit vom Gänskippel uff ihm Weech zu de Kollonade.

Ich habb de Kopp geschittelt. Ich waaß nit, guckt eich doch emol die Heiser drauße uffem Boeder-Gelände oo. Dess sinn doch nix onnerst als mehrstöckische Schloofheiser, moins enaus unn owends widder enoi, daachsiwwer uff die Arweit unn owends vor de Fernseher. Wenn so die Generationsheiser in de Bohnhofstrooß gebaut werrn, dann nit nor Adschee Schitzehof, dann aach Adschee Flerschemer Altstadt.

Doo sächt de Schorsch: Warte merrs emol ab. Villeicht werrn mir Flerschemer joo aach emol gefroocht, bevor so was wie die Bebauung mitte in de Stadt gemacht werdd. Mir lewe joo schließlich hier unn kriehn immer nor was vorgesetzt, unn wenn merr gude Vorschläch mache wie hier omm Stommdisch heert uns kooner zu.

Ich saach: Mir sinns Volk – unns Volk hott sich schunn immer abspise losse misse mett dem was die owwe oogeriehrt hawwe.

De Karl hott gelacht. Unn wisst derr wie dess heeßt? Demokratie!

Eiern Honnes